


বিবিধ—কাব্য


মাইকেল মধুসূদন দত্ত



সম্পাদক :

শ্রীব্রজেন্দ্রনাথ বন্দ্যোপাধ্যায়

শ্রীসজনীকান্ত দাস



বঙ্গীন্দ্র-সাহিত্য-পরিষৎ

২৪৩১, আপার সারকুলার রোড

কলিকাতা

প্রকাশক
শ্রীরামকমল সিংহ
বঙ্গীয়-সাহিত্য-পরিষৎ

ফাল্গুন, ১৩৪৭

চারি আনা

মুদ্রাকর—শ্রীসৌরীন্দ্রনাথ দাস
শনিরঞ্জন প্রেস, ২৫১২ মোহনবাগান রো, কলিকাতা
৩২—১০।৩।১৯৪১

ভূমিকা

মধুসূদনের সাহিত্য-জীবন নানা কাবণে নানা ভাবে খণ্ডিত ও বাধাগ্রস্ত হইয়াছিল। চিঠিপত্রে প্রকাশিত তাঁহার বলবিধ সঙ্কল্প, পবিণামে সেগুলিব বিফলতা এবং তাঁহার বিবিধ অসম্পূর্ণ কাব্য ও কবিতায় তাহার প্রমাণ পাওয়া যায়। তিনি নানা সময়ে বিশেষ উৎসাহের সঙ্গে অনেকগুলি কাব্য ও কবিতা রচনা আবস্ত কবিয়াছিলেন কিন্তু শেষ কবিতাে পারেন নাই। এই অসম্পূর্ণ কাব্যগুলির মধ্যে তাহার ‘বীরাস্ত্রনা কাব্য’ ও নীতিগর্ভ কবিতাবলীই আমাদের বিশেষ আক্ষেপেব কাবণ হইয়া আছে। বর্তমান সংস্করণ গ্রন্থাবলীর এই বিবিধ খণ্ডটি কবি মধুসূদনের বিবাট সম্ভাবনার ও বিপুল নৈরাশোর নিদর্শন।

এই বিক্ষিপ্ত কবিতা ও কাব্যাংশগুলি আমরা নানা স্থান হইতে সংগ্রহ কবিয়াছি। কবির জীবিতকালে বিভিন্ন সাময়িক-পত্রে ইহাদের কয়েকটি মাত্র প্রকাশিত হইয়াছিল; বাকিগুলি তাঁহার মৃত্যুর পরেই প্রকাশিত হইয়াছে। সাময়িক-পত্রে সবগুলি বাহির হয় নাই। ‘জীবন-চরিতে’ ও ‘মধু-স্মৃতি’তে অধিকাংশই স্থান পাইয়াছে। একই কবিতার কোন কোন স্থানে দুইরূপ পাঠ পাওয়া গিয়াছে। কয়েকটি অসম্পূর্ণ কবিতা মধুসূদনের ‘চতুর্দশপদী কবিতাবলী’র ১ম সংস্করণেব (১৮৬৬) পরিশিষ্টে “অসমাপ্ত কাব্যাবলি” নামে বাহির হইয়াছিল। দীননাথ সান্যাল-সম্পাদিত ‘চতুর্দশপদী কবিতাবলী’র শেষে একটি অপ্ৰকাশিত-পূর্ক কবিতা আছে; নগেন্দ্রনাথ সোম সেটি সংগ্রহ করিয়া দিয়াছিলেন। আমরা এই খণ্ডে এই সকলগুলিই একত্র সন্নিবিষ্ট করিলাম। কবিতাগুলিকে যত দূর সম্ভব, কালানুক্রমিক সাজাইবার চেষ্টা করিয়াছি। যে যে স্থান হইতে কবিতা-গুলি সংগৃহীত হইয়াছে, নিম্নে তাহার নির্দেশ দিলাম। “যো” বলিতে যোগীন্দ্রনাথ বসু-প্রণীত ‘জীবন-চরিত’ চতুর্থ সংস্করণ এবং “ন” বলিতে নগেন্দ্রনাথ সোম-প্রণীত ‘মধু-স্মৃতি’ বুঝিতে হইবে।

- ১। বর্ষাকাল যো. পৃ. ১০০-১
- ২। হিমঋতু ঐ পৃ. ১০১
- ৩। রিজিয়া ঐ পৃ. ৬৭৮-৮০
- ৪। কবি-মাতৃভাষা ঐ পৃ. ৪৭৭
- ৫। আত্ম-বিলাপ —ভক্তবোধিনী পত্রিকা, ১৭৮৩ শক, আশ্বিন
- ৬। বঙ্গভূমির প্রতি—সোমপ্রকাশ, ১৬ জুন, ১৮৬২
- ৭-৮। ভারত-বৃত্তান্ত —দ্রৌপদীস্বয়ম্বর—প্রবাসী, ভাদ্র ১৩১১
- ৯। —মৎস্যগন্ধা—আর্য্যদর্শন, ফাল্গুন ১২৯০, পৃ. ২৮৮
- ১০। সুভদ্রা-হরণ —চতুর্দশপদী কবিতাবলী, ১ম সংস্করণ, পৃ. ১০১-৪
- ১১। নীতিগর্ভ কাব্য—ময়ূর ও গৌরী ঐ পৃ. ১১৪-৬
- ১২। —কাক ও শৃগালী ঐ পৃ. ১১৭-৮
- ১৩। —রসাল ও স্বর্ণলতিকা ঐ পৃ. ১১৮-২২
- ১৪। —অশ্ব ও কুরঙ্গ যো. পৃ. ৫৯৪
- ১৫। —দেবদৃষ্টি ন. পৃ. ৫২৮-৩২
- ১৬। —গদা ও সদা—প্রবাসী, আশ্বিন ১৩১১, পৃ. ২৯৪-৯৫
- ১৭। —কুক্কট ও মণি চতুর্দশপদী, দীননাথ, পৃ. ৯৮
- ১৮। —সূর্য্য ও মৈনাক-গিরি ঐ পৃ. ৯৯-১০১
- ১৯। —মেঘ ও চাতক ঐ পৃ. ১০২-৪
- ২০। —পীড়িত সিংহ ও অশ্রাশ্র পশু ঐ পৃ. ১০৫-৬
- ২১। —সিংহ ও মশক ঐ পৃ. ৯৫-৭
- ২২। ঢাকাবাসীদিগের অভিনন্দনের উত্তরে যো. পৃ. ৬০৬-৭
- ২৩। পুরুলিয়া জ্যোতিরিন্দ্র, এপ্রিল ১৮৭২, পৃ. ১১৭
- ২৪। পরেশনাথ গিরি আর্য্যদর্শন, আষাঢ় ১২৮১, আশ্বিন ১২৯১
- ২৫। কবির ধর্ম্মপুত্র জ্যোতিরিন্দ্র, নবেম্বর ১৮৭২, পৃ. ৪০
- ২৬। পঞ্চকোট গিরি ন. পৃ. ৫২২
- ২৭। পঞ্চকোটস্থ রাজশ্রী ন. পৃ. ৫২৩
- ২৮। পঞ্চকোট-গিরি বিদায়-সঙ্গীত ন. পৃ. ৫২৩-৪

২৯।	সমাধি-লিপি	যো.	পৃ. ৬৩৯
৩০।	পাণ্ডব-বিজয়	আর্য্যদর্শন, আষাঢ়	১২৯১
৩১।	দুর্যোধনের মৃত্যু	ঐ চৈত্র	১২৮৯
৩২।	সিংহল-বিজয়	ঐ শ্রাবণ	১২৯১
৩৩।	হতাশা-পীড়িত হৃদয়ের ছঃখধ্বনি	ঐ বৈশাখ,	১২৯১
৩৪।	দেবদানবীয়ম্	ঐ ফাল্গুন,	১২৯০
৩৫।	জীবিতাবস্থায় অনাদৃত কবিগণের সম্বন্ধে	প্রবাসী, ভাদ্র	১৩১১
৩৬।	পণ্ডিতবর শ্রীযুক্ত ঈশ্বরচন্দ্র বিদ্যাসাগর	ঐ	

সন্দেহস্থলে আমরা নিজেদের বুদ্ধিমত পাঠ গ্রহণ করিয়াছি। কোনও কোনও কবিতার স্থানে স্থানে অর্থনির্ণয় কষ্টসাধ্য; অনেক স্থলে স্পষ্ট মুদ্রাকর ও অশ্লীল প্রমাদ আছে। পরিশিষ্টে “দুরূহ শব্দের ব্যাখ্যা”য় সেগুলি প্রদর্শিত হইল। “বর্ষাকাল” ও “হিমঝতু” কবির বাল্যরচনা।

সূচীপত্র

বর্ষাকাল	...	৩
হিমঝত	...	৩
রিজিয়া	...	৪
কবি-মাতৃভাষা	...	৬
আত্ম-বিলাপ	...	৬
বঙ্গভূমির প্রতি	...	৯
ভারতবৃত্তান্ত : দ্রৌপদীস্বয়ম্বর	...	১০-১১
মৎস্যগন্ধা	...	১২
সুভদ্রা-হরণ	...	১৩
নীতিগর্ভ কাব্য :		
ময়ূর ও গোরী	...	১৫
কাক ও শৃগালী	...	১৭
রসাল ও স্বর্ণ-লতিকা	...	১৮
অশ্ব ও কুরঙ্গ	...	২১
দেবদৃষ্টি	...	২৪
গদা ও সদা	...	২৬
কুক্কট ও মণি	...	২৯
সূর্য ও মৈনাক-গিরি	...	৩০
মেঘ ও চাতক	...	৩২
পীড়িত সিংহ ও অন্ত্যাত্ম পশু	...	৩৫
সিংহ ও মশক	...	৩৬
চাকাবাসীদিগের অভিনন্দনের উত্তরে		৩৮
পুরুলিয়া	...	৬৮
পরেশনাথ গিরি	...	৩৯
কবির ধর্মপুত্র	...	৪০

পঞ্চকোট গিরি	...	৪০
পঞ্চকোটস্থ রাজশ্রী	...	৪১
পঞ্চকোট-গিরি বিদায়-সঙ্গীত	...	৪২
সমাধি-লিপি	...	৪২
পাণ্ডববিজয়	...	৪৩
হুর্থে্যাধনের মৃত্যু	...	৪৪
সিংহল-বিজয়	...	৪৬
হতাশা-পীড়িত হৃদয়ের ছঃখধ্বনি	...	৪৭
দেবদানবীয়ম্	...	৪৮
জীবিতাবস্থায় অনাদৃত কবিগণের সম্বন্ধে		৪৮
পণ্ডিতবর শ্রীযুক্ত ঈশ্বরচন্দ্র বিদ্যাসাগর		৪৯

বিবিধ

বর্ষাকাল

গভীর গর্জন সদা করে জলধর,
উথলিল নদনদী ধরণী উপর ।
রমণী রমণ লয়ে, সুখে কেলি করে,
দানবাদি দেব, যক্ষ সুখিত অস্তরে ।
সমীরণ ঘন ঘন বন বন রব,
বরুণ প্রবল দেখি প্রবল প্রভাব ।
স্বাধীন হইয়া পাছে পরাধীন হয়,
কলহ করয়ে কোন মতে শাস্ত নয় ॥

হিমঋতু

হিমস্তের আগমনে সকলে কম্পিত,
রামাগণ ভাবে মনে হইয়া দুঃখিত ।
মনাঞ্জে ভাবে মনে হইয়া বিকার,
নিবিল প্রেমের অগ্নি নাহি জ্বলে আর ।
ফুরায়েছে সব আশা মদন রাজার
আসিবে বসন্ত আশা—এই আশা সার ।
আশায় আশ্রিত জনে নিরাশ করিলে,
আশাতে আশার বস আশায় মারিলে ।
সৃষ্টিয়াছি আশাতরু আশিত হইয়া,
নষ্ট কর হেন তরু নিরাশ করিয়া ।
যে জন করয়ে আশা, আশার আশ্বাসে,
নিরাশ করয়ে তারে কেমন মানসে ॥

রিজিয়া

হা বিধি, অধীর আমি । অধীর কে কবে,
এ পোড়া মনের জ্বালা জুড়াই কি দিয়া ?
হে স্মৃতি, কি হেতু যত পূর্বকথা কয়ে,
দ্বিগুণিছ এ আগুন, জিজ্ঞাসি তোমারে !
কি হেতু লো বিষদম্ব ফণিরূপ ধরি,
মুছমুছ দংশে আজি জর্জরি হৃদয়ে ?
কেমনে, লো ছুঁটা নারি, ভুলিলি নিষ্ঠুরে
আমায় ? সে পূর্ব সত্য, অঙ্গীকার যত,
সে আদর, সে সোহাগ, সে ভাব কেমনে
ভুলিল ও মন তোর, কে কবে আমারে ?
হায় লো সে প্রেমানুর কি তাপে শুকাল ?
এ হেন সুবর্ণ-দেহে কি সুখে রাখিলি
এ হেন ছুরস্তু আত্মা, রে ছুরাত্মা বিধি !
এ হেন সুবর্ণময় মন্দিরে স্থাপিলি
এ হেন কু-দেবতারে তুই কি কৌতুকে ?
কোথা পাব হেন মন্ত্র যার মহাবলে
ভুলি তোর, ভূত কাল, প্রমত্ত যেমতি
বিশ্বরে (সুরার তেজে, যা কিছু সে করে)
জ্ঞানোদয়ে ? রে মদন, প্রমত্ত করিলি
মোরে প্রেম-মদে তুই ; ভুলা তবে এবে,
ঘটিল যা কিছু, যবে ছিন্ন জ্ঞান-হীনে ।
এ মোর মনের ছুঁখ কে আছে বুঝিবে ?
বন্ধুমাত্র মোর তুই, চল্ সিদ্ধদেশে,
দেখিব কি থাকে ভাগ্যে ! হয়ত মারিব,

বিবিধ : রিজিয়া

এ মনাগ্নি নিবাইব ঢালি লছ-শ্রোতে,
নতুবা, রে যত্ন, তোর নীরব সদনে
ভুলিব এ মহাজ্বালা—দেখিব কি ঘটে !
কি কাজ জীবনে আর ! কমল বিহনে
ডুবে অভিমানে জলে মৃগাল, যত্নপি
হরে কেহ শিরোমণি, মরে ফণী শোকে ।
চূড়াশূন্য রথে চড়ি কোন্ বীর যুঝে ?
কি সাধ জীবনে আর ? রে দারুণ বিধি,
অমৃত যে ফলে, আজ বিষাক্ত করিলি
সে ফলে ? অনন্ত আয়ুদায়িনী সুধারে
না পেয়ে, কি হলাহল লভিন্ম মথিয়া
অকূল সাগরে, হায় হিয়া জ্বালাইতে ?
হা ধিক্ ! হা ধিক্ তোরে নারীকুলাধমা !
চণ্ডালিনী ব্রহ্মকূলে তুই পাপীয়সী,
আর তোর পোড়া মুখ কভু না হেরিব,
যত দিন নাহি পারি তোর যমরূপে
আক্রমিতে রণে তোরে বীরপরাক্রমে !
ভেবেছিন্মু লয়ে তোরে সোহাগে বাসরে
কত যে লো ভালবাসি কব তোর কানে,
বায়ু যথা ফুলদলে সায়ংকালে পেয়ে
কাননে । সে প্রেমাশায় দিন্মু জলাঞ্জলি ।
সে সুবর্ণ আশালতা তুই লো নিষ্ঠুরা
দাবানল-শিখারূপে নিষ্ঠুরে পোড়ালি !
পশু রে বিবরে তোর, তুই কাল ফণী ।

কবি-মাতৃভাষা

নিজাগারে ছিল মোর অমূল্য রতন
অগণ্য ; তা সবে আমি অবহেলা করি,
অর্থলোভে দেশে দেশে করিহু ভ্রমণ,
বন্দরে বন্দরে যথা বাণিজ্যের তরী ।
কাটাইহু কত কাল সুখ পরিহরি,
এই ব্রতে, যথা তপোবনে তপোধন,
অশন, শয়ন ত্যজে, ইষ্টদেবে স্মরি,
তঁাহার সেবায় সদা সঁপি কায় মন ।
বঙ্গকুল-লক্ষ্মী মোরে নিশার স্বপনে
কহিলা—“হে বৎস, দেখি তোমার ভকতি,
সুপ্রসন্ন তব প্রীতি দেবী সরস্বতী ।
নিজ গৃহে ধন তব, তবে কি কারণে
ভিখারী তুমি হে আজি, কহ ধন-পতি ?
কেন নিরানন্দ তুমি আনন্দ-সদনে ?”

আত্ম-বিলাপ

১

আশার ছলনে ভুলি কি ফল লভিহু, হায়,
তাই ভাবি মনে ?
জীবন-প্রবাহ বহি কাল-সিন্ধু পানে যায়,
কিরাব কেমনে ?
দিন দিন আয়ুহীন, হীনবল দিন দিন,—
তবু এ আশার নেশা ছুটিল না ? এ কি দায় !

২

রে প্রমত্ত মন মম ! কবে পোহাইবে রাতি ?
জাগিবি রে কবে ?
জীবন-উচ্চানে তোর যৌবন-কুসুম-ভাতি
কত দিন রবে ?
নীর-বিন্দু দুর্বাদলে, নিত্য কি রে ঝলঝলে ?
কে না জানে অশ্রুবিষ অশ্রুমুখে স্রঃপাতি ?

৩

নিশার স্বপন-সুখে সুখী যে, কি সুখ তার ?
জাগে সে কাঁদিতে !
ক্ষণপ্রভা প্রভা-দানে বাড়ায় মাত্র আঁধার
পথিকে ধাঁদিতে !
মরীচিকা মরুদেশে, নাশে প্রাণ তৃষাক্রেশে ; -
এ তিনের ছল সম ছল রে এ কু-আশার ।

৪

প্রেমের নিগড় গড়ি পরিলি চরণে সাদে ;
কি ফল লভিলি ?
জ্বলন্ত-পাবক-শিখা-লোভে তুই কাল-কাঁদে
উড়িয়া পড়িলি !
পতঙ্গ যে রঙ্গে ধায়, ধাইলি, অবোধ, হায় !
না দেখিলি, না শুনিলি, এবে রে পরাণ কাঁদে !

৫

বাকী কি রাখিলি তুই বৃথা অর্থ-অশ্বেষণে,
 সে সাধ সাধিতে ?
 ক্ষত মাত্র হাত তোর মৃগাল-কণ্টকগণে
 কমল তুলিতে !
 নারিলি হরিতে মণি, দংশিল কেবল ফণী !
 এ বিষম বিষজ্বালা ভুলিবি, মন, কেমনে !

৬

যশোলাভ লোভে আয়ু কত যে ব্যয়িলি হয়,
 কব তা কাহারে ?
 সুগন্ধ কুমুম-গন্ধে অন্ধ কীট যথা ধায়,
 কাটিতে তাহারে,—
 মাৎসর্য্য-বিষদশন, কামড়ে রে অমুক্তগণ !
 এই কি লভিলি লাভ, অনাহারে, অনিদ্রায় ?

৭

মুক্তা-ফলের লোভে, ডুবে রে অতল জলে
 যতনে ধীবর,
 শতমুক্তাধিক আয়ু কালসিদ্ধ জলতলে
 ফেলিস, পামর !
 ফিরি দিবে হারাধন, কে তোরে, অবোধ মন,
 হয় রে, ভুলিবি কত আশার কুহক-ছলে !

বঙ্গভূমির প্রতি

“My native Land, Good night !”—Byron.

রেখো, মা, দাসেরে মনে, এ মিনতি করি পদে ।

সাধিতে মনের সাদ,

ঘটে যদি পরমাদ,

মধুহীন করো না গো তব মনঃকোকনদে ।

প্রবাসে, দৈবের বশে,

জীব-তারা যদি খসে

এ দেহ-আকাশ হতে,— নাহি খেদ তাহে ।

জন্মিলে মরিতে হবে,

অমর কে কোথা কবে,

চিরস্থির কবে নীর, হায় রে, জীবন-নদে ?

কিন্তু যদি রাখ মনে,

নাহি, মা, ডরি শমনে ;

মক্ষিকাও গলে না গো, পড়িলে অমৃত-হৃদে !

সেই ধন্য নরকুলে,

লোকে যারে নাহি ভুলে,

মনের মন্দিরে সদা সেবে সর্বজন ;—

কিন্তু কোন্ গুণ আছে,

যাচিব যে তব কাছে,

হেন অমরতা আমি, কহ, গো, শ্রামা জন্মদে !

তবে যদি দয়া কর,

ভুল দোষ, গুণ ধর,

অমর করিয়া বর দেহ দাসে, সুবরদে !—

ফুটি যেন স্মৃতি-জলে,

মানসে, মা, যথা ফলে

মধুময় তামরস কি বসন্ত, কি শরদে !

ভারত-বৃত্তান্ত

দ্রৌপদীস্বয়ম্বর

VERSAILLES,
9th September, 1863.

কেমনে রথীন্দ্র পার্থ স্ববলে লভিলা
পরাভবি রাজবৃন্দে চারুচন্দ্রাননা
কৃষ্ণায়, নবীন ছন্দে সে মহাকাহিনী
কহিবে নবীন কবি বঙ্গবাসী জনে,
বাগ্‌দেবি ! দাসেরে যদি কৃপা কর তুমি ।
না জানি ভকতি স্তুতি, না জানি কি ক'রে
আরাধি হে বিশ্বারাধ্যা তোমায় ; না জানি
কি ভাবে মনের ভাব নিবেদি ও পদে !
কিন্তু মার প্রাণ কভু নারে কি বৃষ্টিতে
শিশুর মনের সাধ, যদিও না ফুটে
কথা তার ? উর তবে, উর মা, আসরে ।
আইস মা এ প্রবাসে বঙ্গের সঙ্গীতে
জুড়াই বিরহজ্বালা, বিহঙ্গম যথা
রঙ্গহীন কুপিঞ্জরে কভু কভু ভুলে
কারাগারছখ সাধি কুঞ্জবনস্বরে ।
সত্যবতীসতীশ্রুত, হে গুরু, ভারতে
কবিতা-সুধার সরে বিকচিত চির
কমল দ্বিতীয় তুমি ; কৃতাজ্জলিপুটে
প্রণমে চরণে দাস, দয়া কর দাসে ।
হায় নরাধম আমি ! ডরি গো পশিতে
যথায় কমলাসনে আসীনা দেউলে
ভারতী ; তেঁই হে ডাকি দাঁড়িয়ে ছয়ারে,
আচার্য্য । আইস শীঘ্র দ্বিজোত্তম সুরি ।

দাসের বাসনা, ফুলে পূজি জননীরে,
বর চাহি দেহ ব্যাস, এই বর মাগি ।

গভীর সূড়ঙ্গপথে চলিলা নীরবে
পঞ্চ ভাই সঙ্গে সতী ভোজেন্দ্রনন্দিনী
কুন্তী ; স্বরচিত-গৃহে মরিল দুর্শ্বতি
পুরোচন ; * * *

দ্রৌপদীস্বয়ম্বর

কেমনে রথীন্দ্র পার্থ পরাভবি রণে
লক্ষ রণসিংহ শূরে পাঞ্চাল নগরে
লভিলা দ্রুপদবালা কৃষ্ণা মহাধনে,
দেবের অসাধ্য কৰ্ম সাধি দেববরে,—
গাইব সে মহাগীত । এ ভিক্ষা চরণে,
বাগ্‌দেবি ! গাইব মা গো নব মধুস্বরে,
কর দয়া, চিরদাস নমে পদাস্বজে,
দয়ায় আসরে উর, দেবি শ্বেতভূজে !

* * *

বিধিলা লক্ষ্যে পার্থ, আকাশে অঙ্গরী
গাইল বিজয়গীত, পুষ্পবৃষ্টি করি
আকাশসম্ভবা দেবী সরস্বতী আসি
কহিলা এ সব কথা কৃষ্ণারে সম্ভাষি ।

লো পঞ্চালরাজসুতা কৃষ্ণা গুণবতি,
তব প্রতি সুপ্রসন্ন আজি প্রজাপতি ।
এত দিনে ফুটিল গো বিবাহের ফুল ।
পেয়েছ সুন্দরি ! স্বামী ভুবনে অতুল ।

চেন কি উহারে উনি কোন্ মহামতি,
 কত গুণে গুণবান্ জানো কি লো সতি ?
 না চেনো না জানো যদি শুন দিয়া মন,
 ছদ্মবেশী উনি ধনি, নহেন ব্রাহ্মণ ।
 অত্যাচ ভারতবংশশিরে শিরোমণি
 কুস্তীর হৃদয়নিধি বিখ্যাত ফাল্গুনি ।
 ভস্মরাশি মাঝে যথা লুপ্ত ছতাশন
 সেইরূপ ক্ষত্রতেজ আছিল গোপন ।
 অগ্নেয়গিরির গর্ভ করি বিদারণ
 যথা বেগে বাহিরয় ভীম ছতাশন,
 অথবা ভেদিয়া যথা পূরব গগন
 সহসা আকাশে শোভে জ্বলন্ত তপন,
 সেইরূপ এত দিনে পাইয়া সময়,
 লুপ্ত ক্ষত্রতেজ বহি হইল উদয় ।

মৎস্তগন্ধা

চেয়ে দেখ, মোর পানে, কলকল্লোলিনি
 যমুনে ! দেখিয়া, কহ, শুনি তব মুখে,
 বিধুমুখি, আছে কি গো অখিল জগতে,
 দুঃখিনী দাসীর সম ? কেন যে সৃজিলা,—
 কি হেতু বিধাতা, মোরে, বুঝিব কেমনে ?
 তরুণ যৌবন মোর ! না পারি লড়িতে
 পোড়া নিতম্বের ভরে ! কবরীবন্ধন
 খুলি যদি, পোড়া চুল পড়ে ভূমিতলে !
 কিন্তু, কে চাহিয়া কবে দেখে মোর পানে ?

না বসে গুঞ্জরি সখি, শিলীমুখ যথা
 শ্বেতাস্বরী ধুতুরার নীরস অধরে,
 হেরি অভাগীরে দূরে ফিরে অধোমুখে
 যুবকুল ; কাঁদি আমি বসি লো বিরলে !

সুভদ্রা-হরণ

প্রথম সর্গ

কেমনে ফাস্কনি শূর স্বপুণে লভিলা
 (পরাভবি যত্ন-বৃন্দে) চারু-চন্দ্রাননা
 ভদ্রায় ;—নবীন ছন্দে সে মহাকাহিনী
 কহিবে নবীন কবি বঙ্গবাসি-জনে,
 বাগ্দেরি, দাসেরে যদি কৃপা কর তুমি ।
 না জানি ভকতি, স্তুতি ; না জানি কি কয়ে,
 আরাধি, হে বিশ্বারাধ্যে, তোমায় ; না জানি
 কি ভাবে মনের ভাব নিবেদি ও পদে !
 কিন্তু মার প্রাণ কভু নারে কি বুঝিতে
 শিশুর মনের সাধ, যদিও না ফুটে
 কথা তার ? কৃপা করি উর গো আসরে ।
 আইস, মা, এ প্রবাসে, বঙ্গের সঙ্গীতে
 জুড়াই বিরহ-জ্বালা, বিহঙ্গম যথা,
 কারাবন্ধ পিঁজিরায়, কভু কভু ভুলে
 কারাগার-ছখ, স্মরি নিকুঞ্জের স্বরে ।

ইন্দ্রপ্রস্থে পঞ্চ ভাই পাঞ্চালীয়ে লয়ে
 কৌতুকে করিলা বাস । আদরে ইন্দ্রিরা
 (জগত-আনন্দময়ী) নব-রাজ-পুরে

উরিলা ; লাগিল নিত্য বাড়িতে চৌদিকে
 রাজ-শ্রী, শ্রীবরদার পদের প্রসাদে !—
 এ মঙ্গলবার্তা শুনি নারদের মুখে
 শচী, বরাক্ষনা দেবী, বৈজয়ন্ত-ধামে
 রুষিলা । জ্বলিল পুনঃ পূর্বকথা স্মরি,
 দাবানল-রূপ রোষ হিয়া-রূপ বনে,
 দগধি পরাণ তাপে ! “হা ধিক্ !”—ভাবিলা
 বিরলে মানিনী মনে—“ধিক্ রে আমারে !
 আর কি মানিবে কেহ এ তিন ভুবনে
 অভাগিনী ইন্দ্রাণীরে ? কেন তাকে দিলি
 অনন্ত-যৌবন-কাস্তি, তুই, পোড়া বিধি ?
 হায়, কারে কব ছুখ ? মোরে অপমানি,
 ভোজ-রাজ-বালা কুণ্ডী—কুল-কলঙ্কিনী,—
 পাপীয়সী—তার মান বাড়ান কুলিশী ?
 যৌবন-কুহকে, ধিক্, যে ব্যভিচারিণী
 মজাইল দেব-রাজে, মোরে লাজ দিয়া ।
 অর্জুন—জারজ তার—নাহি কি শক্তি
 আমার—ইন্দ্রাণী আমি—মারি সে অর্জুনে,
 এ পোড়া চখের বালি ?—ছর্য্যোথনে দিয়া
 গড়াইলু জতুগৃহ ; সে ফাঁদ এড়ায়ে
 লক্ষ্য বিঁধি, লক্ষ রাজে বিমুখি সমরে
 পাঞ্চালীরে মন্দমতি লভিল পঞ্চালে ।
 অহিত সাধিতে, দেখ, হতাশ হইলু
 আমি, ভাগ্য-শুণে তার !—কি ভাগ্য ? কে জানে
 কোন্ দেবতার বলে বলী ও ফাল্গুনি ?
 বুঝি বা সহায় তার আপনি গোপনে
 দেবেন্দ্র ? হে ধর্ম্ম, তুমি পার কি সহিতে

এ আচার চরাচরে ? কি বিচার তব !
 উপপত্তী কুস্তীর জারজ পুত্র প্রতি
 এত যত্ন ? কারে কব এ ছুথের কথা—
 কার বা শরণ, হায়, লব এ বিপদে ?”
 কঙ্কণ-মণ্ডিত বাহু হানিলা ললাটে
 ললনা ! ছুকুল সাড়ী তিতি গলগলে
 বহিল আঁখির জল, শিশির যেমতি
 হিমকালে পড়ি আর্দ্রে কমলের দলে !
 “যাইব কলির কাছে” আবার ভাবিলা
 মানিনী—“কুটিল কলি খ্যাত ত্রিভুবনে,—
 এ পোড়া মনের ছুঃখ কব তার কাছে,
 এ পোড়া মনের ছুঃখ সে যদি না পারে
 জুড়াতে কৌশল করি, কে আর জুড়াবে ?
 যায় যদি মান, যাক্ ! আর কি তা আছে ?”
 ইত্যাদি ।

নীতিগর্ভ কাব্য

ময়ূর ও গৌরী

ময়ূর কহিল কাঁদি গৌরীর চরণে,
 কৈলাস-ভবনে ;—
 “অবধান কর দেবি,
 আমি ভূত্য নিত্য সেবি
 প্রিয়োক্তম স্মৃতে তব এ পৃষ্ঠ-আসনে ।
 রথী যথা দ্রুত রথে,
 চলেন পবন-পথে
 দাসের এ পিঠে চড়ি সেনানী স্মৃতি ;

তবু, মা গো, আমি ছুখী অতি !
 করি যদি কেকা-ধ্বনি,
 ঘুণায় হাসে অমনি
 খেচর, ভুচর জন্তু ;—মরি, মা, শরমে !
 ডালে মূঢ় পিক যবে
 গায় গীত, তার রবে
 মাতিয়া জগৎ-জন বাখানে অধমে !
 বিবিধ কুসুম কেশে,
 সাজি মনোহর বেশে,
 বরেন বসুধা দেবী যবে ঋতুবরে
 কোকিল মঙ্গল-ধ্বনি করে ।
 অহরহ কুহুধ্বনি বাজে বনস্থলে ;
 নীরবে থাকি, মা, আমি ; রাগে হিয়া জ্বলে !
 ঘুচাও কলঙ্ক শুভঙ্করি,
 পুত্রের কিঙ্কর আমি এ মিনতি করি,
 পা ছুখানি ধরি ।”
 উত্তর করিলা গৌরী স্মমধুর স্বরে ;—
 “পুত্রের বাহন তুমি খ্যাত চরাচরে,
 এ আক্ষেপ কর কি কারণে ?
 হে বিহঙ্গ, অঙ্গ-কান্তি ভাবি দেখ মনে !
 চন্দ্রকলাপে দেখ নিজ পুচ্ছ-দেশে ;
 রাখাল রাজার সম চূড়াখানি কেশে !
 আখণ্ডল-ধনুর বরণে
 মণ্ডিলা সূ-পুচ্ছ খাতা তোমার সৃজনে !
 সদা জ্বলে তব গলে
 স্বর্ণহার ঝল ঝলে,
 যাও, বাছা, নাচ গিয়া ঘনের গর্জনে,

হরষে সু-পুচ্ছ খুলি
 শিরে স্বর্ণ-চূড়া তুলি ;
 * * করগে কেলি ব্রজ-কুঞ্জ-বনে ।
 করতালি ব্রজাঙ্গনা
 দেবে রঙ্গে বরাঙ্গনা—
 তোষ গিয়া ময়ূরীরে প্রেম-আলিঙ্গনে !
 শুন বাছা, মোর কথা শুন,
 দিয়াছেন কোন কোন গুণ,
 দেব সনাতন প্রতি-জনে ;
 সু-কলে কোকিল গায়,
 বাজ বজ্র-গতি ধায়,
 অপরূপ রূপ তব, খেদ কি কারণে ?”—
 নিজ অবস্থায় সদা স্থির যার মন,
 তার হতে সুখীতর অত্ন কোন জন ?

কাক ও শৃগালী

একটি সন্দেশ চুরি করি,
 উড়িয়া বসিলা বৃক্ষোপরি,
 কাক, ছুট্ট-মনে ;
 সুখাচের বাস পেয়ে,
 আইল শৃগালী ধেয়ে,
 দেখি কাকে কহে ছুট্টা মধুর বচনে ;—
 “অপরূপ রূপ তব, মরি ।
 তুমি কি গো ব্রজের শ্রীহরি,—
 গোপিনীর মনোবাঞ্ছা ?—কহ গুণমণি ।

হে নব নীরদ-কাস্তি,
 ঘুচাও দাসীর ভ্রাস্তি,
 যুড়াও এ কান ছুটি করি বেণু-ধ্বনি !
 পুণ্যবতী গোপ-বধু অতি !
 তেঁই তারে দিলা বিধি,
 তব সম রূপ-নিধি,—
 মোহ হে মদনে তুমি ; কি ছার যুবতী ?
 গাও গীত, গাও, সখে করি এ মিনতি !
 কুড়াইয়া কুসুম-রতনে,
 গাঁথি মালা সূচারু গাঁথনে,
 দোলাইয়া দিব তব * * * *
 দাসীর সাধনে * *
 বাজাও মধুর * *
 বাস-বসে মাতি * * * *
 মজিল * * *
 মুখ খুলি * * *
 * * * খে মু * * *
 * * * গীত আ * * *

রসাল ও স্বর্ণ-লতিকা

রসাল কহিল উঁচ্রে স্বর্ণলতিকারে ;—
 “শুন মোর কথা, ধনি, নিন্দ বিধাতারে !
 নিদারুণ তিনি অতি ;
 নাহি দয়া তব প্রতি ;
 তেঁই ক্ষুদ্র-কায়া করি সৃজিলা তোমারে !

* আদর্শপত্রের কয়েক স্থানে দৈবাৎ পোকায় কাটিয়া ফেলিয়াছে ।

মলয় বহিলে, হায়,
 নতশিরা তুমি তায়,
 মধুকর-ভরে তুমি পড় লো ঢলিয়া ;
 হিমাঙ্গি সদৃশ আমি,
 বন-বৃক্ষ-কুল-স্বামী,
 মেঘলোকে উঠে শির আকাশ ভেদিয়া !
 কালাগ্নির মত তপ্ত তপন তাপন,—
 আমি কি লো ডরাই কখন ?
 দূরে রাখি গাভী-দলে,
 রাখাল আমার তলে
 বিরাম লভয়ে অনুক্ষণ,—
 শুন, ধনি, রাজ-কাজ দরিদ্র পালন !
 আমার প্রসাদ ভুঞ্জে পথ-গামী জন ।
 কেহ অন্ন রাঁধি খায়
 কেহ পড়ি নিদ্রা যায়
 এ রাজ-চরণে ।
 শীতলিয়া মোর ডরে
 সদা আসি সেবা করে
 মোর অতিথির হেথা আপনি পবন !
 মধু-মাখা ফল মোর বিখ্যাত ভুবনে !
 তুমি কি তা জান না, ললনে ?
 দেখ মোর ডাল-রাশি,
 কত পাখী বাঁধে আসি
 বাসা এ আগারে !
 ধন্য মোর জনম সংসারে !
 কিন্তু তব ছুখ দেখি নিত্য আমি ছুখী ;
 নিন্দ বিধাতায় তুমি, নিন্দ, বিধুমুখি !”

মধুসুদন-গ্রন্থাবলী

* * * মধুর স্বরে
 * * * * রে,
 * * * * * * * ;
 * * * * * * *
 * * * প্রভু,
 * * * দয়ামি * *
 * * * যথা * *

যুদ্ধার্থ গম্ভীরতার বাণী তব পানে !

সুধা-আশে আসে অলি,

দিলে সুধা যায় চলি,—

কে কোথা কবে গো দুখী সখার মিলনে ?”

“ক্ষুদ্র-মতি তুমি অতি”

রাগি কহে তরুপতি,

“নাহি কিছু অভিমান ? ধিক্ চন্দ্রাননে !”

নীরবিলা তরুরাজ ; উড়িল গগনে

যমদূতাকৃতি মেঘ গম্ভীর স্বননে ;

আইলেন প্রভঞ্জন,

সিংহনাদ করি ঘন,

যথা ভীম ভীমসেন কৌরব-সমরে ।

আইল খাইতে মেঘ দৈত্যকুল রড়ে ;

ঐরাবত পিঠে চড়ি

রাগে দাঁত কড়মড়ি,

ছাড়িলেন বজ্র ইন্দ্র কড় কড় কড়ে !

উরু ভাঙ্গি কুরুরাজে বধিলা যেমতি

ভীম যোধপতি ;

মহাঘাতে মড় মড়ি

রসাল ভূতলে পড়ি,

হায়, বায়ুবলে

হারাইলা আয়ু-সহ দর্প বনস্থলে !
 উর্দ্ধশির যদি তুমি কুল মান ধনে ;
 করিও না ঘৃণা তবু নীচশির জনে !
 এই উপদেশ কবি দিলা এ কৌশলে ॥

অশ্ব ও কুরঙ্গ

১

অশ্ব, নবদূর্ব্বাময় দেশে, বিহরে একেলা অধিপতি
 নিত্য নিশা অবশেষে শিশিরে সরস দূর্ব্বা অতি ।
 বড়ই সুন্দর স্থল, অদূরে নির্ঝরে জল,
 তরু, লতা, ফল, ফুল, বন-বীণা অলিকুল ;
 মধ্যাহ্নে আসেন ছায়া, পরম শীতল কায়া,
 পবন ব্যজন ধরে, পত্র যত নৃত্য করে,
 মহানন্দে অশ্বের বসতি ॥

২

কিছু দিনে উজ্জ্বলনয়ন,
 কুরঙ্গ সহসা আসি দিল দরশন ।
 বিশ্বয়ে চৌদিকে চায়, যা দেখে বাগানে তায়,
 কতক্ষণে হেরি অশ্বে কহে মনে মনে ;—
 “হেন রাজ্যে এক প্রজা এ ছুখ না সহে !
 তোমার প্রসাদ চাই, শুন হে বন-গৌসাই,
 আপদে, বিপদে দেব, পদে দিও ঠাই ॥”

৩

এক পার্শ্ব করি অধিকার, আরঞ্জিল কুরঙ্গ বিহার ;
 খাইল অনেক ঘাস, কে গণিতে পারে গ্রাস ?
 আহার করণাস্তরে করিল পান নিৰ্বারে ;
 পরে মৃগ তরুতলে নিদ্রা গেল কুতূহলে—
 গৃহে গৃহস্বামী যথা বলী স্বত্ববলে ॥

৪

বাক্যহীন ক্রোধে অশ্ব, নিরখি এ লীলা,
 ভোজবাজি কিম্বা স্বপ্ন ! নয়ন মুদীলা ;
 উন্মীলি ক্ষণেক পরে কুরঙ্গে দেখিলা,
 রঙ্গে শুয়ে তরুতলে ; দ্বিগুণ আগুন হৃদে জ্বলে ;
 তীক্ষ্ণ ক্ষুর আঘাতনে ধরণী ফাটিল,
 ভীম হেঁষা গগনে উঠিল ।
 প্রতিধ্বনি চৌদিকে জাগিল ॥

৫

নিদ্রাভঙ্গে মৃগবর কহিলা, “ওরে বর্বর !
 কে তুই, কত বা বল ?
 সৎ পড়সীর মত না থাকিবি, হবি হত ।
 কুরঙ্গের উজ্জ্বল নয়ন ভাতিল সরোষে যেন দুইটি তপন

৬

হয়ের হৃদয়ে হৈল ভয়, ভাবে এ সামান্য পশু নয়,
 শিরে শৃঙ্গ শাখাময় !

প্রতি শৃঙ্গ শূলের আকার
বুঝি বা শূলের তুল্য ধার,
কে আমারে দিবে পরিচয় ?

৭

মাঠের নিকটে এক মৃগয়ী থাকিত,
অশ্ব তারে বিশেষ চিনিত ।
ধরিতে এ অশ্ববরে, নানা ফাঁস নিরন্তরে
মৃগয়ী পাতিত ।
কিন্তু সৌভাগ্যের বলে, তুরঙ্গম মায়া-ছলে
কভু না পড়িত ॥

৮

কহিল তুরঙ্গ ;—“পশু উচ্চশৃঙ্গধারী—
মোর রাজ্য এবে অধিকারী ;
না চাহিল অনুমতি, কর্কশভাষী সে অতি ;
হও হে সহায় মোর, মারি ছুই জনে চোর ॥”

৯

মৃগয়ী করিয়া প্রতারণা, কহিলা, “হা ! এ কি বিড়ম্বনা
জানি সে পশুরে আমি, বনে পশুকূলে স্বামী,
শার্দূলে, সিংহেরে নাশে, দঙ্কে বন বিষম্বাসে ;
একমাত্র কেবল উপায় ;—
মুখস ও মুখে পর, পৃষ্ঠে চক্ষ্মাসন ধর,
আমি সে আসনে বসি, করে ধনুর্বাণ অসি,
তা হলে বিজয় লভা যায় ॥”

১০

হায় ! ক্রোধে অন্ধ অশ্ব, কুছলে ভুলিল ;
 লাফে পৃষ্ঠে ছুঁষ্ট সাদী অমনি চড়িল ।
 লোহার কণ্টকে গড়া অস্ত্র, বাঁধা পাতুকায়,
 তাহার আঘাতে প্রাণ যায় ।
 মুখস নাশিল গতি, ভয়ে হয় ক্ষিপ্তমতি,
 চলে সাদী যে দিকে চালায় ॥

১১

কোথা অরি, কোথা বন, সে সুখের নিকেতন ?
 দিনান্তে হইলা বন্ধী আঁধার-শালায় ।
 পরের অনিষ্ট হেতু ব্যগ্র যে দুর্শ্ৰুতি,
 এই পুরস্কার তার কহেন ভারতী ;
 ছায়া সম জয় যায় ধর্ম্মের সংহতি ॥

দেবদৃষ্টি

শচী সহ শচীপতি স্বর্ণ-মেঘাসনে,
 বাহিরিলা বিশ্ব দরশনে ।
 আরোহি বিচিত্র রথ,
 চলে সঙ্গে চিত্ররথ,
 নিজদলে বিমণ্ডিত অস্ত্র আভরণে,
 রাজাজ্ঞায় আশুগতি বহিলা বাহনে
 হেরি নানা দেশ সুখে,
 হেরি বহু দেশ দুঃখে—

ধর্মের উন্নতি কোন স্থলে ;
 কোথাও বা পাপ শাসে বলে—
 দেব অগ্রগতি বক্ষে উতরিল ।
 কহিলা মাহেন্দ্র সতী শচী স্মলোচনা,
 কোন্ দেশে এবে গতি,
 কহ হে প্রাণের পতি,
 এ দেশের সহ কোন্ দেশের তুলনা ?
 উত্তরিল মধুর বচনে
 বাসব, লো চন্দ্রাননে,
 বঙ্গ এ দেশের নাম বিখ্যাত জগতে ।
 ভারতের প্রিয় মেয়ে
 মা নাই তাহার চেয়ে
 নিত্য অলঙ্কৃত হীরা, মুক্তা, মরকতে ।
 সম্মেহে জাহ্নবী তারে
 মেখলেন চারি ধারে
 বরুণ ধোয়েন পা ছু'খানি ।
 নিত্য রক্ষকের বেশে
 হিমাদ্রি উত্তর দেশে
 পরেশনাথ আপনি
 শিরে তার শিরোমণি
 সেই এই বঙ্গভূমি শুন লো ইন্দ্রাণি !
 দেবাদেশে আশুগতি
 চলিলেন মৃদুগতি
 উঠিল সহসা ধ্বনি
 সভয়ে শচী অমনি ইন্দ্রেই স্মখিলা,—
 নীচে কি হতেছে রণ
 কহ সখে বিবরণ

হেন দেশে হেন শব্দ কি হেতু জন্মিলা ?
 চিত্ররথ হাত জোড় করি,
 কহে, শুন, ত্রিদিব-ঈশ্বর !
 'বিবাহ করিয়া এক বালক যাইছে,
 পত্নী আসে দেখ তার পিছে ।'
 সুধাংশুর অংশুরূপে নয়ন-কিরণ
 নীচদেশে পড়িল তখন ।

গদা ও সদা

গদা সদা নামে
 কোন এক গ্রামে
 ছিল দুই জন ।
 দূর দেশে যাইতে হইল ;
 দুজনে চলিল ।
 ভয়ানক পথ—পাশে পশু ফণী বন,
 ভল্লুক শার্দূল তাহে গর্জে অমুক্তন ।
 কালসর্প যেমতি বিবরে,
 তস্কর লুকায়ে থাকে গিরির গহ্বরে ;
 পথিকের অর্থ অপহরে,
 কখন বা প্রাণনাশ করে ।
 কহে সদা গদারে আহ্বানি
 কর কিরা পশি মোর পাণি
 ধর্ম্মে সাক্ষী মানি,
 আজি হতে আমরা দুজন
 হ'মু একপ্রাণ একমন,—
 সিদ্ধু অমুসিদ্ধু যথা—জান সে কাহিনী ।

আমার মঙ্গল যাহে,
তোমার মঙ্গল তাহে,
কবচে ভেদিলে বাণ, বক্ষ ক্ষত যথা,
অমঙ্গলে অমঙ্গল উভয়ের তথা ।

কহে গদা ধর্মসাক্ষী করি,
কিরা মোর তব কর ধরি,
একাত্মা আমরা দৌহে কি বাঁচি কি মরি ।
এইরূপে মৈত্র আলাপনে
মনানন্দে চলিলা ছুজনে ।
সতর্ক রক্ষকরূপে সদা গদা যেন
বন পাশে একদৃষ্টে চাহে অনুক্ষণ,
পাছে পশু সহসা করয়ে আক্রমণ ।
গদা চারি দিকে চায়,
এরূপে উভয়ে যায় ;

দেখে গদা সম্মুখে চাহিয়া
থল্যে এক পথেতে পড়িয়া ।
দৌড়ে মৃঢ় থল্যে তুলি
হেরে কুতূহলে খুলি
পূর্ণ থল্যে সুবর্ণমুদ্রায়,
তোলা ভার, এত ভারি তায় ।

কহে গদা সহাস বদনে
করেছিলু যাত্রা আজি অতি শুভক্ষণে
আমরা ছুজনে ।

‘ছুজনে ?’ কহিল সদা রাগে,
‘লোভ কি করিস্ তুই এ অর্থের ভাগে ?
মোর পূর্ব পুণ্যফলে
ভাগ্যদেবী এই ছলে

মোরে অর্থ দিলা ।

পাগী তুই, অংশ তোরে

কেন দিব, ক' তা মোরে

এ কি বাললীলা ?

রবির করের রাশি পরশি রতনে

বরাঙ্গের আভা তার বাড়ায় যতনে ;

কিন্তু পড়ি মাটির উপরে

সে কর কি কোন ফল ধরে ?

সৎ যে তাহার শোভা ধনে,

অসৎ নিতান্ত তুই, জনম কুক্ষণে ।'

এই কয়ে সদানন্দ খল্যে তুলে লয়ে

চলিতে লাগিলা সুখে অগ্রসর হয়ে ।

বিস্ময়ে অবাক্ গদা চলিল পশ্চাতে,—

বামন কি কভু পায় চারু চাঁদে হাতে ?

এই ভাবি অতি ধীরে ধীরে

গেল গদা তিতি অশ্রুণীরে ।

দুই পাশে শৈলকুল ভীষণ-দর্শন,

শৃঙ্গ যেন পরশে গগন ।

গিরিশিরে বরষায় প্রবলা যেমতি

ভীমা শ্রোতস্বতী,

পথিক ছুজনে হেরি তস্করের দল

নাবি নীচে করি কোলাহল

উভে আক্রমিল ।

সদা অতি কাতরে কহিল,—

শুন ভাই, পাঞ্চালে যেমতি,

বিষ্ণু রথিপতি,

জিনি লক্ষ রাজে শূর কৃষ্ণায় লভিল,

মার চোরে করি রণ-লীলা ।
 এই ধন নিও পরে বাঁটি
 হিসাবে করিয়া আঁটাআঁটি,
 তস্করদলের মাথা কাটি ।
 কহে গদা, পাপী আমি, তুমি সৎজন,
 ধর্মবলে নিজধন করহ রক্ষণ ।
 তস্কর-কুল-ঈশ্বরে
 কহিল সে যোড়করে,
 অধিপতি ওই জন ভাই,
 সঙ্গী মাত্র আমি ওর, ধর্মের দোহাই ।
 সঙ্গী মাত্র যদি তুই, যা চলি বর্বর,
 নতুবা ফেলিব কাটি, কহিল তস্কর ।
 ফাঁদে বাঁধা পাখী যথা পাইলে মুকতি,
 উড়ি যায় বায়ুপথে অতি দ্রুতগতি,
 গদা পলাইল ।
 সদানন্দ নিরানন্দে বিপদে পড়িল ।
 আলোক থাকিতে তুচ্ছ কর তুমি যারে,
 বঁধু কি তোমার কভু হয় সে আধারে ?
 এই উপদেশ কবি দিলা এ প্রকারে ।

কুক্কুট ও মণি

খুঁটিতে খুঁটিতে ক্ষুদ্র কুক্কুট পাইল

একটি রতন ;—

বণিকে সে ব্যগ্রে জিজ্ঞাসিল ;—

“ঠোঁটের বলে না টুটে, এ বস্তু কেমন ?”

মধুসূদন-গ্রন্থাবলী

বণিক্ কহিল,—“ভাই,
 এ হেন অমূল্য রত্ন, বুঝি, ছুটি নাই !”
 হাসিল কুক্কট শূনি ;—“তগুলের কণা
 বহুমূল্যতর ভাবি ;—কি আছে তুলনা ?”
 “নহে দোষ তোর, মূঢ়, দৈব এ ছলনা,
 জ্ঞান-শূন্য করিল গোসাই !”—
 এই কয়ে বণিক্ ফিরিল ।

মূর্থ যে, বিচার মূল্য কভু কি সে জানে ?
 নর-কুলে পশু বলি লোকে তারে মানে ;—
 এই উপদেশ কবি দিলা এই ভানে ।

সূর্য ও মৈনাক-গিরি

উদয়-অচলে,
 দিবা-মুখে এক-চক্রে দিলা দরশন,
 অংশু-মালা গলে,
 বিতরি সুবর্ণ-রশ্মি চৌদিকে তপন ।
 ফুটিল কমল জলে
 সূর্য্যমুখী স্মখে স্থলে,
 কোকিল গাইল কলে,
 আমোদি কানন ।
 জাগে বিখে নিদ্রা ত্যজি বিশ্ববাসী জন ;
 পুনঃ যেন দেব স্রষ্টা সৃজিলা মহীরে ;
 সজীব হইলা সবে জনমি, অচিরে ।
 অবহেলি উদয়-অচলে,
 শূন্য-পথে রথবর চলে ;

বাড়িতে লাগিল বেলা,
 পদ্মের বাড়িল খেলা,
 রজনী তারার মেলা সর্বত্র ভাঙ্গিল ;—
 কর-জালে দশ দিক্ হাসি উজলিল ।
 উঠিতে লাগিলা ভানু নীল নভঃস্থলে ;
 দ্বিতীয়-তপন-রূপে নীল সিন্ধু-জলে
 মৈনাক ভাসিল ।

কহিল গম্ভীরে শৈল দেব দিবাকরে ;—
 “দেখি তব ধীর গতি ছুখে আঁখি ঝরে ;
 পাও যদি কষ্ট,—এস, পৃষ্ঠাসন দিব ;
 যেখানে উঠিতে চাও, সবলে তুলিব ।”
 কহিলা হাসিয়া ভানু ;—“তুমি শিষ্টমতি ;
 দৈববলে বলী আমি, দৈববলে গতি ।”

মধ্যাকাশে শোভিল তপন,—
 উজ্জ্বল-যৌবন, প্রচণ্ড-কিরণ ;
 তাপিল উত্তাপে মহী ; পবন বহিলা
 আগুনের শ্বাস-রূপে ; সব শুকাইলা—
 শুকাল কাননে ফুল ;
 প্রাণিকুল ভয়াকুল ;
 জলের শীতল দেহ দহিয়া উঠিল ;
 কমলিনী কেবল হাসিল !
 হেন কালে পতনের দশা,
 আ মরি ! সহসা
 আসি উতরিল ;—
 হিরণ্ময় রাজাসন ত্যজিতে হইল ।

অধোগামী এবে রবি,
 বিষাদে মলিন-ছবি,
 হেরি মৈনাকেরে পুনঃ নীল সিঙ্কু-জলে,
 সম্ভাষি কহিলা কুতূহলে ;—
 “পাইতেছি কষ্ট, ভাই, পূর্বাসন লাগি ;
 দেহ পৃষ্ঠাসন এবে, এই বর মাগি ;
 লও ফিরে মোরে, সখে, ও মধ্য-গগনে ;—
 আবার রাজত্ব করি, এই ইচ্ছা মনে ।”

হাসি উত্তরিল শৈল ;—“হে মূঢ় তপন,
 অধঃপাতে গতি যার কে তার রক্ষণ !
 রমার থাকিলে কুপা, সবে ভালবাসে ;—
 কাঁদ যদি, সঙ্গে কাঁদে ; হাস যদি, হাসে ;
 চাকেন বদন যবে মাধব-রমণী,
 সকলে পলায় রড়ে, দেখি যেন ফণী ।”

মেঘ ও চাতক

উড়িল আকাশে মেঘ গরজি ভৈরবে ;—
 ভানু প্লাইল ত্রাসে ;
 তা দেখি তড়িৎ হাসে ;
 বহিল নিশ্বাস ঝড়ে ;
 ভাঙ্গে তরু মড়-মড়ে ;
 গিরি-শিরে চূড়া নড়ে,
 যেন ভূ-কম্পনে ;
 অধীরা সভয়ে ধরা সাধিলা বাসবে ।

আইল চাতক-দল,
মাগি কোলাহলে জল—

“তৃষায় আকুল মোরা, ওহে ঘনপতি !
এ জ্বালা জুড়াও, প্রভু, করি এ মিনতি ।”
বড় মান্নুষের ঘরে ব্রতে, কি পরবে,
ভিখারী-মণ্ডল যথা আসে ঘোর রবে ;—

কেহ আসে, কেহ যায় ;
কেহ ফিরে পুনরায়
আবার বিদায় চায় ;
ব্রহ্ম লোভে সবে ;—
সেরূপে চাতক-দল,
উড়ি করে কোলাহল ;—

“তৃষায় আকুল মোরা, ওহে ঘনপতি !
এ জ্বালা জুড়াও জলে, করি এ মিনতি ।”

রোষে উত্তরিলে ঘনবর ;—

“অপরে নির্ভর যার, অতি সে পামর !
বায়ু-রূপ দ্রুত রথে চড়ি,
সাগরের নীল পায়ে পড়ি,
আনিয়াছি বারি ;—
ধরার এ ধার ধারি ।

এই বারি পান করি,
মেদিনী সুন্দরী
বৃক্ষ-লতা-শস্যচয়ে
স্তন-ছক্ক বিতরয়ে

শিশু যথা বল পায়,
 সে রসে তাহারা খায়,
 অপরূপ রূপ-সুধা বাড়ে নিরন্তর ;
 তাহারা বাঁচায়, দেখ, পশু-পক্ষী-নর ।

নিজে তিনি হীন-গতি ;
 জল গিয়া আনিবারে নাহিক শক্তি ;
 তেঁই তাঁর হেতু বারি-ধারা ।—
 তোমরা কাহারা ?
 তোমাদের দিলে জল,
 কভু কি ফলিবে ফল ?
 পাখা দিয়াছেন বিধি ;
 যাও, যথা জলনিধি ;—
 যাও, যথা জলাশয় ;—
 নদ-নদী-তড়াগাদি, জল যথা রয় ।
 কি গ্রীষ্ম, কি শীত কালে,
 জল যেখানে পালে,
 সেখানে চলিয়া যাও, দিনু এ যুক্তি ।”

চাতকের কোলাহল অতি ।
 ক্রোধে তড়িতে ঘন কহিলা,—
 “অগ্নি-বাণে তাড়াও এ দলে ।”—
 তড়িৎ প্রভুর আজ্ঞা মানিলা ।
 পলায় চাতক, পাখা জ্বলে ।

যা চাহ, লভ তা সদা নিজ-পরিশ্রমে ;
 এই উপদেশ কবি দিলা এই ক্রমে ।

গীড়িত সিংহ ও অন্যান্য পশু

অধিক-বয়স-ভরে হয়ে হীন-গতি,
সিংহ কৃশ অতি ।
জনরব-রূপ-শ্রোতে,
ভাসাল ঘোষণা-পোতে,
এই কথা ;—“মৃগরাজ মগ্ন রাজকাজে ;
প্রজাবর্গ, রাজপুরে পূজ কুল-রাজে ।”

প্রভু-ভক্তি-মদে মাতি
কুরঙ্গ, তুরঙ্গ, হাতী,
করে করি রাজকর,
পালা-মতে নিরঙর,
গেলা চলি রাজ-নিকেতনে,
অতি হৃষ্ট মনে ।

শৃগাল-কুলের পালা আসি উতরিল ;
কুল-মন্ত্রী সভা আহ্বানিল ;
কি ভেট, কি উপহার,
কি পানায়, কি আহার,—
এই লয়ে ঘোর তর্ক-বিতর্ক হইল ।
হেন কালে আর মন্ত্রী সহাসে কহিল ;—
“তর্কের যে অলঙ্কার তোমরা সকলে,—
এ বিশ্বে এ বিশ্ব-জনে বলে ;
কিস্তি কহ দেখি, শুনি, কেন স্থানে-স্থানে
বহুবিধ পদ-চিহ্ন রাজ-গৃহ-পানে ?—
ফিরে যে আসিছে, তার চিহ্ন কে মুছিল ?”
চতুর যে সর্বদর্শী, বিপদের জালে
পদ তার পড়িতে পারে কোন্ কালে ?

সিংহ ও মশক

শঙ্খনাদ করি মশা সিংহে আক্রমিল ;
ভব-তলে যত নর,
ত্রিদিবে যত অমর,
আর যত চরাচর,
হেরিতে অদ্ভুত যুদ্ধ দৌড়িয়া আইল ।
হুল-রূপ শূলে বীর, সিংহেরে বিঁধিল !
অধীর ব্যথায় হরি,
উচ্চ-পুচ্ছে ক্রোধ করি,
কহিলা ;—“কে তুই, কেন
বৈরিভাব তোর হেন ?
গুণভাবে কি জ্ঞা লড়াই ?—
সম্মুখ-সমর কর ; তাই আমি চাই ।
দেখিব বীরত্ব কত দূর,
আঘাতে করিব দৰ্প-চূর ;
লঙ্ঘনের মুখে কালি
ইন্দ্রজিতে জয়-ডালি,
দিয়াছে এ দেশে কবি ।”
কহে মশা ;—“ভীক, মহাপাপি,
যদি বল থাকে, বিষম-প্রতাপি,
অশ্রায়-শ্রায়-ভাবে,
ক্ষুধায় যা পায়, খাবে ;
ধিক্, ছুষ্টমতি ।
মারি তোরে বন-জীবে দিব, রে, কু-মতি

হইল বিষম রণ, তুলনা না মিলে ;
 ভীম দুর্ঘোষনে,
 ঘোর গদা-রণে,
 হৃদ দ্বৈপায়নে,
 ভীরুসে সে রণ-ছায়া পড়িল সলিলে ;
 ডরাইয়া জল-জীবী জল-জন্তুচয়ে,
 সভয়ে মনেতে ভাবিল,
 প্রলয়ে বুঝি এ বীরেন্দ্র-দ্বয় এ সৃষ্টি নাশিল !

মেঘনাদ মেঘের পিছনে,
 অদৃশ্য আঘাতে যথা রণে ;
 কেহ তারে মারিতে না পায়,
 ভয়ঙ্কর স্বপ্নসম আসে,—এসে যায়,
 জর-জরি শ্রীরামের কটক লঙ্কায় ।

কভু নাকে, কভু কাণে,
 ত্রিশূল-সদৃশ হানে
 ছল, মশা বীর ।
 না হেরি অরিরে হরি,
 মুহুমুহু নাদ করি,
 হইলা অধীর ।

হায় ! ক্রোধে হৃদয় ফাটিল ;—
 গত-জীব মৃগরাজ ভূতলে পড়িল ।

ক্ষুদ্র শত্রু ভাবি লোক অবহেলে যারে,
 বহুবিধ সঙ্কটে সে ফেলাইতে পারে ;—
 এই উপদেশ কবি দিলা অলঙ্কারে ।

ঢাকাবাসীদিগের অভিনন্দনের উত্তরে

নাহি পাই নাম তব বেদে কি পুরাণে,
কিন্তু বঙ্গ-অলঙ্কার তুমি যে তা জানি
পূর্ব-বঙ্গে । শোভ তুমি এ সুন্দর স্থানে
ফুলবৃন্তে ফুল যথা, রাজাসনে রাণী ॥
প্রতি ঘরে বাঁধা লক্ষ্মী (থাকে এইখানে)
নিত্য অতিথিনী তব দেবী বীণাপাণি ।
পাঁড়ায় দুর্বল আমি, তেঁই বুঝি আনি
সৌভাগ্য, অপিলা মোরে (বিধির বিধানে)
তব করে, হে সুন্দরি ! বিপজ্জাল যবে
বেড়ে কারো, মহৎ যে সেই তার গতি ।
কি হেতু মৈনাক গিরি ডুবিল অর্ণবে ?
দ্বৈপায়ন হৃদতলে কুরুকুলপতি ?
যুগে যুগে বসুন্ধরা সাধেন মাধবে,
করিও না ঘৃণা মোরে, তুমি, ভাগ্যবতি !

পুরুলিয়া*

পাষণময় যে দেশ, সে দেশে পড়িলে
বীজকুল, শস্ত তথা কখন কি ফলে ?
কিন্তু কত মনানন্দ তুমি মোরে দিলে,
হে পুরুল্যে ! দেখাইয়া ভকত-মণ্ডলে !
শ্রীভ্রষ্ট সরস সম, হায়, তুমি ছিলে,
অজ্ঞান-তিমিরাচ্ছন্ন এ দূর জঙ্গলে ;

* পুরুলিয়ার শ্রীষ্ট-মণ্ডলকে লক্ষ্য করিয়া লিখিত ।

এবে রাশি রাশি পদ্য ফোটে তব জলে,
 পরিমল-ধনে ধনী কবিয়া অনিলে !
 প্রভুর কি অন্তগ্রহ ! দেখ ভাবি মনে,
 (কত ভাগ্যবান্ তুমি কব তা কাহারে ?)
 রাজাসন দিলা তিনি ভূপতিত জনে !
 উজ্জলিলা মুখ তব বঙ্গের সংসারে ;
 বাড়ুক সৌভাগ্য তব এ প্রার্থনা করি,
 ভাসুক সত্যতা-স্রোতে নিত্য তব তরি ।

পরেশনাথ গিরি

হেরি দূরে উর্দ্ধশিরঃ তোমার গগনে,
 অচল, চিত্রিত পটে জীমূত যেমতি ।
 ব্যোমকেশ তুমি কি হে, (এই ভাবি মনে)
 মজি তপে, ধরেছ ও পাষণ-মূরতি ?
 এ হেন ভীষণ কায়া কার বিশ্বজনে ?
 তবে যদি নহ তুমি দেব উমাপতি,
 কহ, কোন্ রাজবীর তপোব্রতে ব্রতী—
 খচিত শিলার বর্ষ্ম কুম্ভ-রতনে
 তোমার ? যে হর-শিরে শশিকলা হাসে,
 সে হর কিরীটরূপে তব পুণ্য শিরে
 চিরবাসী, যেন বাঁধা চিরপ্রেমপাশে !
 হেরিলে তোমায় মনে পড়ে ফাস্তুনীরে
 সেবিলা বীরেশ যবে পাশুপত আশে
 ইন্দ্রকীল নীলচূড়ে দেব ধূর্জটিরে ।

কবির ধর্মপুত্র

(শ্রীমান্ খ্রীষ্টদাস সিংহ)

হে পুত্র, পবিত্রতর জনম গৃহিলা
আজি তুমি, করি স্নান যর্দনের নীরে
সুন্দর মন্দির এক আনন্দে নির্মিলা
পবিত্রাঙ্গা বাস হেতু ও তব শরীরে ;
সৌরভ কুসুমের যথা, আসে যবে ফিরে
বসন্ত, হিমান্তকালে । কি ধন পাইলা—
কি অমূল্য ধন বাছা, বুঝিবে অচিরে,
দৈববলে বলী তুমি, শুন হে, হইলা !
পরম সৌভাগ্য তব । ধর্ম-বর্ম ধরি
পাপ-রূপ রিপু নাশো এ জীবন-স্থলে ;
বিজয়-পতাকা তোলি রথের উপরি ;
বিজয় কুমার সেই, লোকে যারে বলে
খ্রীষ্টদাস, লাভো নাম, আশীর্ব্বাদ করি,
জনক জননী সহ, প্রেম কুতূহলে ।

পঞ্চকোট গিরি

কাটীলা মহেন্দ্র মঠে বজ্র প্রহরণে
পর্ব্বতকুলের পাখা ; কিন্তু হীনগতি
সে জন্ম নহ হে তুমি, জানি আমি মনে,
পঞ্চকোট ! রয়েছ যে,—লঙ্কায় যেমতি
কুম্ভকর্ণ,—রক্ষ, নর, বানরের রণে—
শৃগ্মপ্রাণ, শৃগ্মবল, তবু ভীমাকৃতি,—
রয়েছ যে পড়ে হেথা, অস্ত্র সে কারণে ।

কোথায় সে রাজলক্ষ্মী, যার স্বর্ণ-জ্যোতি
 উজ্জলিত মুখ তব ? যথা অস্তাচলে
 দিনান্তে ভানুর কাস্তি । তেয়োগি তোমায়
 গিয়াছেন দূরে দেবী, তেঁই হে । এ স্থলে,
 মনোহুঃখে মৌন ভাব তোমার ; কে পারে
 বুঝিতে, কি শোকানল ও হৃদয়ে জ্বলে ?
 মণিহারা ফণী তুমি রয়েছ আধারে ।

পঞ্চকোটস্থ রাজশ্রী

হেরিনু রমারে আমি নিশার স্বপনে ;
 হাঁটু গাড়ি হাতী ছুটি শুঁড়ে শুঁড়ে ধরে—
 পদ্মাসন উজ্জলিত শতরত্ন-করে,
 ছুই মেঘরাশি-মাঝে, শোভিছে অম্বরে,
 রবির পরিধি যেন । রূপের কিরণে
 আলো করি দশ দিশ ; হেরিনু নয়নে,
 সে কমলাসন-মাঝে ভূলাতে শঙ্করে
 রাজরাজেশ্বরী, যেন কৈলাস-সদনে ।
 কহিলা বাগ্‌দেবী দাসে (জননী যেমতি
 অবোধ শিশুরে দীক্ষা দেন প্রেমাদরে),
 “বিবিধ আছিল পুণ্য তোর জন্মান্তরে,
 তেঁই দেখা দিলা তোরে আজি হৈমবতী
 যেক্রমে করেন বাস চির রাজ-ঘরে
 পঞ্চকোট ;—পঞ্চকোট—ওই গিরিপতি ।”

পঞ্চকোট-গিরি বিদায়-সঙ্গীত

হেরেছি, গিরিবর ! নিশার স্বপনে,
অদ্ভুত দর্শন ।
হাঁটু গাড়ি হাতী ছুটি শুঁড়ে শুঁড়ে ধরে,
কনক-আসন এক, দীপ্ত রত্ন-করে
দ্বিতীয় তপন ।
যেই রাজকুলখ্যাতি তুমি দিয়াছিলি,
সেই রাজকুললক্ষ্মী দাসে দেখা দিলা,
শোভি সে আসন
হে সখে ! পাষণ তুমি, তবু তব মনে
ভাবরূপ উৎস, জানি, উঠে সর্বক্ষণে ।
ভেবেছি, গিরিবর ! রমার প্রসাদে,
তঁার দয়াবলে,
ভাঙা গড় গড়াইব, জলপূর্ণ করি
জলশূন্য পরিখায় ; ধনুর্বাণ ধরি দ্বারিগণ
আবার রক্ষিবে দ্বার অতি কুতূহলে ।

সমাধি-লিপি

দাঁড়াও, পথিক-বর, জন্ম যদি তব
বঙ্গে ! তিষ্ঠ ক্ষণকাল ! এ সমাধিস্থলে
(জননীর কোলে শিশু লভয়ে যেমতি
বিরাম) মহীর পদে মহানিত্যরূত
দত্তকুলোদ্ভব কবি শ্রীমধুসূদন ।

যশোরে সাগরদাঁড়ী কবতক্ষ-ভীরে
 জন্মভূমি, জন্মদাতা দত্ত মহামতি
 রাজনারায়ণ নামে, জননী জাহ্নবী !

পাণ্ডববিজয়

প্রথম সর্গ

কেমনে সংহারি রণে কুরুকুলরাজে,
 কুরুকুল-রাজাসন লভিলা ছাপরে
 ধর্মরাজ ;—সে কাহিনী, সে মহাকাহিনী,
 নব রঙ্গে বঙ্গজনে, উরি এ আসরে,
 কহ, দেবি ! গিরি-গৃহে স্নুকালে জনমি
 (আকাশ-সম্ভবা ধাত্রী কাদম্বিনী দিলে
 স্তনামৃতরূপে বারি) প্রবাহ যেমতি
 বহি, ধায় সিন্ধুমুখে, বদরিকাশ্রমে,
 ও পদ-পালনে পুষ্ট কবি-মনঃ, পুনঃ
 চলিল, হে কবি-মাতঃ, যশের উদ্দেশে ।
 যথা সে নদের মুখে স্নমধুর ধ্বনি,
 বহে সে সঙ্গীতে যবে মঞ্জু কুঞ্জান্তরে
 সমদেশে ; কিন্তু ঘোর কল্লোল, যেখানে
 শিলাময় স্থল রোধে অবিরলগতি ;—
 দাসের রসনা আসি রস নানা রসে,
 কভু রৌদ্রে, কভু বীরে, কভু বা করুণে—
 দেহ ফুলশরাসন, পঞ্চফুলশরে ।

দুর্যোধনের মৃত্যু

“দেখ, দেব, দেখ চেয়ে”, কাতরে কহিলা
কুরুরাজ কৃপাচার্যে,—“আসিছেন ধীরে
নিশীথিনী ; নাহি তারা কবরী-বন্ধনে,—
না শোভে ললাটদেশে চাকু নিশামণি !
শিবির-বাহিরে মোরে লহ কৃপা করি,
মহারথ ! রাখ লয়ে যথায় ঝরিবে
এ ভূনত-শিরে এবে শিশিরের ধারা,
ঝরে যথা শিশুশিরে অবিরল বহি
জননীর অশ্রুজল, কালগ্রাসে যবে
সে শিশু ।” লইলা সবে ধরাধরি করি
শিবির-বাহিরে শূরে—ভগ্ন-উরু রণে !

মহাযত্নে কৃপাচার্য্য পাতিল ভূতলে
উত্তরী । বিষাদে হাসি কহিলা নৃমণি ;—
“কার হেতু এ শূশয্যা, কৃপাচার্য্য রথি ?
পড়িলু ভূতলে, প্রভু, মাতৃগর্ভ তাজি ;—
সেই বাল্যাসন ভিন্ন কি আসন সাজে
অস্ত্রমে ? উঠাও বস্ত্র, বসি হে ভূতলে !
কি শয্যায় সুপ্ত আজি কুরুবীর্য্যরূপী
গাঙ্গেয় ? কোথায় গুরু দ্রোণাচার্য্য রথী,
কোথা অঙ্গপতি কর্ণ ? আর রাজা যত
ক্ষত্র-ক্ষেত্র-পুষ্প, দেব ! কি সাথে বসিবে
এ হেন শয্যায় হেথা দুর্যোধন আজি ?
যথা বনমাঝে বহি জলি নিশাযোগে
আকর্ষি পতঙ্গচয়ে, ভস্মেন তা সবে
সর্ব্বভুক—রাজদলে আহ্বানি এ রণে—

বিনাশিনু আমি, দেব ! নিঃক্ষত্র করিনু
ক্ষত্রপূর্ণ কৰ্মক্ষেত্র নিজ কৰ্মদোষে ।
কি কাজ আমার আর বৃথা সুখভোগে ?
নির্বাণ পাবক আমি, তেজশূন্য, বলি !
ভস্মমাত্র ! এ যতন বৃথা কেন তব !”

সরায়ে উত্তরী শূর বসিলা ভূতলে ।

নিকটে বসিলা কৃপ কৃতবর্মা রথী
বিষাদে নীরব দৌহে ;—আসি নিশীথিনী,
মেঘরূপ ঘোমটায় বদন আবরি,
উচ্চ বায়ু-রূপ শ্বাসে সঘনে নিশ্বাসি ;—
বৃষ্টি-ছলে অশ্রুবারি ফেলিলা ভূতলে ।
কাতরে কহিলা চাহি কৃতবর্মা পানে
রাজেন্দ্র ; “এ হেন ক্ষেত্রে, ক্ষত্রচূড়ামণি,
ক্ষত্র-কুলোদ্ভব, কহ, কে আছে ভারতে,
যে না ইচ্ছে মরিবারে ? যেখানে, যে কালে
আক্রমেন যমরাজ ; সমপীড়া-দায়ী
দণ্ড তাঁর,—রাজপুরে, কি ক্ষুদ্র কুটীরে,
সম ভয়ঙ্কর প্রভু, সে ভীম মূর্তি !
কিন্তু হেন স্থলে তাঁরে আতঙ্ক না করি
আমি !—এই সাধ ছিল চিরকাল মনে !
যে স্তম্ভের বলে, শির উঠায় আকাশে
উচ্চ রাজ-অট্টালিকা ; সে স্তম্ভের রূপে
ক্ষত্রকুল-অট্টালিকা ধরিনু স্ববলে
ভূভারতে । ভূপতিত এবে কালে আমি ;
দেখ চেয়ে চারি দিকে ভগ্ন শত ভাগে
সে সুঅট্টালিকা চূর্ণ এ মোর পতনে !
গড়ায় এক্ষেত্রে পড়ি গৃহচূড়া কত !

আর যত অলঙ্কার—কার সাধ্য গণে ?
 কিন্তু চেয়ে দেখ সবে, কি আশ্চর্য্য ! দেখ—
 রকত বরণে দেখ, সহসা আকাশে
 উদ্ভিছেন এ পৌরব বংশ-আদি যিনি,
 নিশানাথ ! হুর্য্যোধনে ভূশযায় হেরি
 কুবরণ হইলা কি শোকে সুধানিধি ?”
 পাণ্ডব-শিবির পানে ক্ষণেক নিরখি
 উত্তরিলা কৃপাচার্য্য ;—“হে কৌরবপতি,
 নহে চন্দ্র যাহা, রাজা, দেখিছ আকাশে,
 কিন্তু বৈজয়ন্তী তব সর্ব্বভূকরূপে !
 রিপুকুল-চিতা, দেব, জলিয়া উঠিল ।
 কি বিবাদ আর তবে ? মরিছে শিবিরে
 অগ্নি-তাপে ছটফটি ভীম হৃষ্টমতি ;
 পুড়িছে অর্জুন, রায়, তার শরানলে,
 পুড়িল যেমতি হেথা সৈন্যদল তব !
 অস্ত্রিমে পিতায় স্মরে যুধিষ্ঠির এবে ;
 নকুল ব্যাকুলচিত সহদেব সহ !
 আর আর বীর যত এ কাল সমরে
 পাইয়াছে রক্ষা যারা, দাবদন্ধ বনে
 আশে পাশে তরু যথা ;—দেখ মহামতি !

সিংহল-বিজয়

স্বর্ণসৌধে সুধাধরা যক্ষেশ্রমোহিনী
 মুরজা, শুনি সে ধ্বনি অলকা নগরে,
 বিশ্বাসে সাগর পানে নিরখি, দেখিলা
 ভাসিছে সুন্দর ডিঙ্গা, উড়িছে আকাশে

পতাকা, মঙ্গলবাণ বাজিছে চৌদিকে !
 রুঘি সতী শশিমুখী সখীরে কহিলা ;—
 হেদে দেখ, শশিমুখি, আখি ছুটি খুলি,
 চলিছে সিংহলে ওই রাজ্যলাভ-লোভে
 বিজয়, স্বদেশ ছাড়ি লক্ষ্মীর আদেশে !
 কি লজ্জা ! থাকিতে প্রাণ না দিব লইতে
 রাজ্য ওরে আমি, সই ! উদ্যানস্বরূপে
 সাজানু সিংহলে কি লো দিতে পরজনে ?
 জ্বলে রাগে দেহ, যদি স্মরি শশিমুখি,
 কমলার অহঙ্কার ; দেখিব কেমনে
 স্বদাসে আমার দেশ দানেন ইন্দিরা ?
 জলধি জনক তাঁর ; তেঁই শাপ্ত তিনি
 উপরোধে । যা, লো সই, ডাক্ সারথিরে
 আনিতে পুষ্পকে হেথা । বিরাজেন যথা
 বায়ুরাজ, যাব আজি ; প্রভঞ্নে লয়ে
 বাধাব জঞ্জাল, পরে দেখিব কি ঘটে ?
 স্বর্ণতেজঃপুঞ্জ রথ আইল ছয়ারে
 ঘর্ঘরি । হেঘিল অশ্ব, পদ-আক্ষালনে
 সৃজি বিস্মুলিঙ্গবৃন্দে । চড়িলা স্রন্দনে
 আনন্দে সুন্দরী, সাজি বিমোহন সাজে !

হতাশা-পীড়িত হৃদয়ের দুঃখধ্বনি

ভেবেছিহু মোর ভাগ্য, হে রমাসুন্দরি,
 নিবাইবে সে রোষাণি,—লোকে যাহা বলে,
 হ্রাসিতে বাণীর রূপ তব মনে জ্বলে ;—

ভেবেছিলাম, হায় ! দেখি, ভ্রাস্তিভাব ধরি
 ডুবাইছ, দেখিতেছি, ক্রমে এই তরী
 অদয়ে, অতল দুঃখ-সাগরের জলে
 ডুবিবু ; কি যশঃ তব হবে বঙ্গ-স্থলে ?

দেবদানবীয়ম্

মহাকাব্য

প্রথম সর্গঃ

কাব্যেকখানি রচিবারে চাহি,
 কহো কি ছন্দঃ পছন্দ, দেবি ।
 কহো কি ছন্দঃ মনানন্দ দেবে
 মনীয়বৃন্দে এ সুবঙ্গদেশে ?
 তোমার বীণা দেহ মোর হাতে,
 বাজাইয়া তায় যশস্বী হবো,
 অমৃতরূপে তব কৃপাবারি
 দেহো জননি গো, ঢালি এ পেটে ॥

জীবিতাবস্থায় অনাদৃত কবিগণের সম্বন্ধে

ইতিহাস এ কথা কাঁদিয়া সদা বলে,
 জন্মভূমি ছেড়ে চল যাই পরদেশে ।
 উরুপায় কবিগুরু ভিখারী আছিল
 ওমর (অসভ্যকালে জন্ম তাঁর) যথা
 অমৃত সাগরতলে । কেহ না বুঝিল
 মূল্য সে মহামণির ; কিন্তু যম যবে

গ্রাসিল কবির দেহ, কিছু কাল পরে
 বাড়িল কলহ নানা নগরে ; কহিল
 এ নগর ও নগরে, “আমার উদরে
 জনম গ্রহিয়াছিল। ওমর সুমতি ।”
 আমাদের বাল্মীকির এ দশা ; কে জানে,
 কোন্ কুলে কোন্ স্থানে জন্মিলা সুমতি ।

পণ্ডিতবর শ্রীযুক্ত ঈশ্বরচন্দ্র বিদ্যাসাগর মহাশয়কে লক্ষ্য করিয়া

শুনেছি লোকের মুখে পীড়িত আপনি
 হে ঈশ্বরচন্দ্র । বঙ্গে বিধাতার বরে
 বিদ্যার সাগর তুমি ; তব সম মণি,
 মলিনতা কেন কহ ঢাকে তার করে ?
 বিধির কি বিধি সূরি, বৃষ্টিতে না পারি,
 হেন ফুলে কীট কেন পশিবারে পারে ?
 করমনাশার শ্রোত অপবিত্র বারি
 ঢালি জাহ্নবীর গুণ কি হেতু নিবারে ?
 বঙ্গের সূচুড়ামণি করে হে তোমারে
 সৃজিলা বিধাতা, তোমা জানে বঙ্গজনে ;
 কোন্ পীড়ারূপ অরি বাণাঘাতে পারে
 বিধিতে, হে বঙ্গরত্ন । এহেন রতনে ?
 যে পীড়া ধনুক ধরি হেন বাণ হানে
 (রাক্ষসের রূপ ধরি), বৃষ্টিতে কি পার,
 বিদৌর্ণ বঙ্গের হিয়া সে নিষ্ঠুর বাণে ?
 কথিপুত্র সহ মাতা কাঁদে বারম্বার ।

দুর্লভ শব্দ ও বাক্যাংশের ব্যাখ্যা

পংক্তি

- বর্ষাকাল : ৩ রমণ—পুরুষ ।
 ৪ দানবাদি দেব,—দানবাদি, দেব, সজ্জত ।
- হিমস্ফটু : ১ হিমস্ফের—হেমস্ফের (মধুসূদনের প্রয়োগ) ।
- রিজিয়া : ৬ দংশ—দংশ সজ্জত ।
 ২৩ সিদ্ধদেশে—সমুদ্রে ।
- কবি-মাতৃভাষা মধুসূদন-বিরচিত প্রথম চতুর্দশপদী কবিতা ।
 ইহারই সংশোধিত রূপ “বন্ধ-ভাষা” (‘চতুর্দশপদী
 কবিতাবলী’, ৩ নং কবিতা) ।
- আস্ব-বিলাপ : ১২ অম্বুমুখে সত্তঃপাতি—জলের তোড়ে সত্ত সত্ত বিনাশ-
 শীল ।
 ১৯ সাদে—সাধে ।
- ব্রজভূমির প্রতি ২৫ তামরস—পদ্ম ।
- ক্রৌপদীশয়ঘরের : ১৭ বিকচিত—বিকচ (মধুসূদনের প্রয়োগ) ।
 ১৮ দ্বিতীয়—রামায়ণকার বাস্কীকি আদি-কবি বলিয়া
 মহাভারতকারকে মধুসূদন ‘দ্বিতীয় কমল’
 বলিয়াছেন ।
- সুভজা-ছরণ : ৩-১৫ ক্রৌপদীশয়ঘরের প্রায় পুনরুক্তি ।
 ২০ শ্রীবরদা—সন্দ্বী ।
- ময়ূর ও গৌরী : ৩০ কেশে—মস্তকে ।
- কাক ও শৃগালী : ২৩ বাস-বসে—রাস রসে হইবে ।
- অশ্ব ও কুরঙ্গ : ১০ বাগানে—মুহুর-প্রমাদ ; বাগানে হইবে ।
 ৩৬ মৃগয়ী—ব্যাধ ।
 ৫৪ সাদী—অখাবোহী ।

পংক্তি

- দেবদৃষ্টি : ২৩ মেথলেন—মেথলার ত্রায় পরিবেষ্টন করেন
- গদা ও সদা : ১৭ সিদ্ধ অহুসিদ্ধ—স্থল উপস্থল হইবে ।
৭১ লভিল—লভিলা হইবে ।
- ঢাকাবাসীদিগের
অভিনন্দনের উত্তরে : ১০ কারো—মুদ্রাকর-প্রমাদ ; কারে হইবে ।
- পুরুলিয়া : ৫ সরস—সরোবরে ।
১৪ সত্যতা—সভ্যতা হইবে ।
- কবির ধর্মপুত্র : ১১ তোলি—তুলিয়া ।
- পঞ্চকোট গিরি : ১০ তোমায়—তোমারে হইবে ।
- পঞ্চকোটস্থ রাজক্রী : চতুর্থ ও পঞ্চম পংক্তি যথাক্রমে পঞ্চম ও চতুর্থ
পংক্তি হইবে ।
- দুর্যোধনের মৃত্যু : ২৫ সর্বভূক—সর্বভুক হইবে ।
৪৬-৪৭ নিম্নলিখিত রূপ হইবে—
যে স্তম্ভের বলে শির উঠায় আকাশে
উচ্চ রাজ-অটালিকা, সে স্তম্ভের রূপে
- জীবিতাবস্থায়... : ৪ ওমর—হোমার ।